

Ням гарагийн үдээс хойших хуралдаан

2011 оны 4-р сарын 3

Цагаатгалын гайхамшиг

Далын Ахлагч К.Скотт Гроу

Би чуулганд хэлэх үгээ бэлтгэж байтал аав утасдан эрэгтэй дүүг маань нойрондоо зуурдаар таалал төгссөнийг дуулгав. Би маш ихээр гашуудлаа. Дүү маань дөнгөж 51 настай байсан юм. Би түүний тухай бодож байхдаа та нартай түүний амьдралд тохиосон зарим зүйлийн талаар хуваалцах хэрэгтэйг мэдэрсэн юм. Үүнийг хуваалцах зөвшөөрлийг би авсан.

Тэр залуудаа царайлаг, нөхөрсөг, хүмүүстэй эв дүйгээ ололцдог нийтэч нэгэн байсан бөгөөд сайн мэдээнд өөрийгөө зориулсан хүн байв. Бүрэн цагийн номлолд үнэнч шударгаар үйлчилсний дараа хайртай бүсгүйтэйгээ ариун сүмд гэрлэж, тэд хүү, охинтой болж, түүний ирээдүй амлалтаар дүүрэн байлаа.

Гэвч тэрээр сул дорой байдалд орж, хувийн таашаалаа илүүд тавьснаар эрүүл мэнд, гэрлэлт, тэр бүү хэл Сүмийн гишүүн байх эрхээ ч алдахад хүрсэн юм.

Дүү маань гэр орноосоо алс хол арав гаруй жил өөрийн дураар амьдарсан ч Аврагч түүнийг мартаж орхиогүй билээ. Эцэст нь тэр энэ дорой байдалдаа зовж шаналан төлөв даруу сүнснийг бодгальдаа оруулахыг зөвшөөрч, уур хилэн, эсэргүүцэл нь аажмаар намдсан юм. Яг л үрэлгэн хүүгийн адил тэр алдаагаа “ухаарсан.”<sup>1</sup> Тэрээр Аврагчийг эрэлхийлэн, хуучин амьдралынхаа хэв маягийг орхин сайн мэдээгээр явах замдаа эргэж орсон бөгөөд итгэлтэй эцэг эх нь хэзээ ч түүнийг орхиогүй юм.

Энэ нь амар байгаагүй ч тэр наманчлалын замаар алхсан. 12 жил сүмээс хол байсны эцэст тэр дахин баптисм хүртэж, Ариун Сүнсний бэлгийг дахин хүлээн авсан. Түүний санваар ба ариун сүмийн адислалууд ч мөн сэргээгдсэн.

Дүү минь өмнөх амьдралынхаа хэв маягаас шалтгаалсан эрүүл мэндийн асуудалтай байсан ч, нэгэн эмэгтэй түүнтэй ханилж, тэд ариун сүмд лацдан холбогдсон билээ. Тэд

хоёр хүүхэдтэй болсон бөгөөд дүү маань бишопын зөвлөлд хэдэн жил итгэлтэйгээр үйлчилсэн.

Миний дүү гуравдугаар сарын 7-ны даваа гарагт нас барсан бөгөөд нас барахынхаа өмнөх баасан гарагийн орой нь эхнэртэйгээ ариун сүмд орж, ням гарагт дээд пристийн бүлэгтээ санваартны хичээл заасан байв. Дүү маань тэр орой нойрсоод дахиж сэрээгүй ч зөвт хүмүүсийн амилалтаар ирэх болно.

Дүүгийн минь амьдралд Цагаатгалын гайхамшиг байгаад би талархаж байна. Аврагчийн Цагаатгал хүн нэг бүрт боломжтой байдаг.

Бид наманчлалаар дамжуулан цагаатгалыг хүлээн авдаг. Биднийг наманчлахад Их Эзэн алдаа дутагдлуудаа ардаа орхихыг минь зөвшөөрдөг билээ.

“Болгоогтун, нүглүүдээ наманчилсан тэрээр, мөнхүү тэр нь өршөөгддөг ажгуу, мөн Их Эзэн, бибээр тэдгээрийг нь цаашид санах нь үгүй.

“Хүн нүглүүдээ наманчилдаг эсэхийг та нар үүгээр нь мэдэж болно, болгоогтун, тэрээр тэдгээрийг хүлээж мөн орхих болно.”<sup>2</sup>

Амьдралдаа сорилт бэрхшээлтэй тулгарч, будилж төөрсөн хэн нэгнийг бид мэддэг. Тэр нь та нарын найз, хамаатан садан, эцэг эх, хүүхэд, нөхөр, эхнэр хэн ч байж болно. Энэ хүн нь та өөрөө ч байж болно.

Би бүх хүнд хандан Цагаатгалын гайхамшигийн тухай ярьж байна.

Адамын уналтын учир Мессиа Уналтаас хүмүүсийг гэтэлгэхээр ирсэн.<sup>3</sup> Есүс Христийн сайн мэдээний бүх зүйлс Мессиа, Бурханы Хүүгийн цагаатгалын золиослолын зүг чиглүүлэгддэг.<sup>4</sup>

Авралын төлөвлөгөө цагаатгалгүйгээр гүйцэлдэхгүй байсан. “Тиймийн тул Бурхан нь төгс, шударга Бурхан, мөн түүнчлэн нигүүлсэнгүй Бурхан байж болохын тулд нигүүлслийн төлөвлөгөөг гүйцэлдүүлэхээр, шударга ёсны шаардлагыг хангахаар Бурхан өөрөө дэлхийн нүглийн төлөө цагаатгалыг нөхөн төлдөг”.<sup>5</sup>

Унасан хүмүүс нүглүүдийнхээ төлөө цагаатгал хийж чадахгүй тул цагаатгалын золиослол нь нүгэлгүй Бурханы Хүүгээр хийгдэх ёстой байсан.<sup>6</sup> Цагаатгал нь бүх цаг үеийн бүх хүмүүсийг цагаатгах хэмжээлшгүй хийгээд мөнхийн байх ёстой байсан.<sup>7</sup>

Аврагч зовлон шаналал болон үхлээрээ дамжуулж бүх хүмүүний нүглийг цагаатгасан билээ.<sup>8</sup> Түүний Цагаатгал Гетсамений цэцэрлэгт эхэлж, загалмай дээр үргэлжлэн, Амилалтаар төгссөн юм.

“Тийм ээ, бүр тийн тэр хөтлөгдөн, цовдлогдон, мөн хөнөөгдөх болно, уг маханбодь бүр үхлийн харьяат болж, Хүүгийн таалал Эцэгийн таалалд багтах бөлгөө.”<sup>9</sup> Өөрийн цагаатгалын золиослолоороо дамжуулан Тэрбээр “өөрийн бодгалийг нүглийн төлөөс”<sup>10</sup> болгосон.

Бурханы Цорын Ганц Хүүгийн хувьд Тэр биеийн үхлийн хүчийг давах өвийг авсан. Тэр нь Түүнд Өөрийн амийг авч үлдэх боломжийг олгож, Тэрээр “уруу таталтыг, мөн биеийн өвчин, өлсгөлөн, цангаа, мөн зүдрэлийг, энэ нь үхэлд хүргэхээс бусдаар бол бүр хүмүүний тэвчиж чадахаас илүүг тэвчих”<sup>11</sup> зовлонд унасан юм.

Тэр зөвхөн бүх хүмүүний нүглүүдийн төлөөсийг төлөөд зогсохгүй, Тэрбээр мөн “бүх төрлийн өвчин мөн зүдгүүрүүд мөн уруу таталтуудыг өөр дээрээ” авсан юм. Тэр “мөн түүний зүрх сэтгэл бие махбодийн дагуу нигүүлслээр дүүргэгдэж болохын тулд, тэрээр бие махбодийн дагуу өөрийн хүмүүсийг тэдний сул байдлуудынх нь дагуу хэрхэн халамжлахыг мэдэж болохын тулд, тэрээр өөр дээрээ тэдний сул дорой чанаруудыг авсан.”<sup>12</sup>

Аврагч хүн төрөлхтний зовлон зүдгүүрийг, тийм ээ нүгэл ба харамслын зовлонг мэдэрсэн. “Гарцаагүй тэр бидний гашуудлыг хүлээн авч, мөн бидний харамслыг үүрсэн.”<sup>13</sup>

Цагаатгалаараа дамжуулан Тэр зөвхөн нүгэлтнийг эдгээдэггүй, эдгээр нүглүүдийн учир зовон шаналж байгаа гэмгүй хүмүүсийг мөн эдгээдэг билээ. Аврагчийн Цагаатгалд итгэснээр нүгэлтнийг өршөөсөн нэгэн мөн эдгэж чадна.

Хүн бүр “алдаа, нүглүүдээс ирдэг гэм буруугийн мэдрэмжүүдээс хөнгөвчлөгдөх хэрэгтэй”<sup>14</sup> цаг мөчүүд байдаг. Бид наманчлах аваас Аврагч бидний бодгалиас гэм бурууг зайлуулдаг.

Түүний цагаатгалын золиослолоор дамжин бидний нүглүүд уучлагддаг. Цагаатгал мөхлийн хүүг давах болзлыг, бүх цаг үед, нүглийнх нь “наманчлалын нөхцлийн”<sup>15</sup> хэмжээнээс үл шалтгаалан хүн бүрд боломжтой болгосон.

Есүс Христ бидэнд хэмжээлшгүй хайртай учраас биднийг наманчлалд урьдаг.

Наминчилснаар бид нүглүүдийнхээ дүүрэн ачаанд зовж шаналах шаардлагагүй болно.

“Наманчил, мөн чиний зовлон гашуун байх болно, хэр зэрэг гашууныг чи мэдэх нь үгүй, хэр зэрэг хүчтэйг чи мэдэх нь үгүй, тийм ээ, тэвчихэд хэр зэрэг хэцүүг чи мэдэх нь үгүй.

“Учрыг болгоогтун, хэрэв тэд наманчлах аваас, тэд зовохгүй байж болохын тулд Бурхан, бибээр бүхний төлөө эдгээр зүйлүүдийг амссан билээ;

“Хэрэв тэд үл наманчлах аваас бүр миний адилаар тэд зовох ёстой.

“Бүр бүхнээс хамгийн агуу Бурхан намайг өвдөхийн улмаас дагжин чичрэх, мөн сүв бүрээс цус шүүрэх, мөн бие хийгээд сүнс аль алиныг нь зовоход хүргэсэн.”<sup>16</sup>

Аврагч гэм нүглээс болж зовж шаналж яваа тэднийг эдгээхийг хичээж байна. “Би та нарыг эдгээж болохын тулд та нар надад эргэн ирж, мөн нүглүүдээ наманчилж, мөн хөрвүүлэгдэхгүй гэж үү?”<sup>17</sup>

Есүс Христ бол бидний бодгалийн Агуу Эдгээгч мөн. Түүний Цагаатгалын эдгээх хүчгүйгээр мөхлийн нүглүүдээс ангижрах нүгэл, гэм буруу, өвчин, гашуудал гэж үгүй.

Биднийг нүгэл үйлдэхэд Сатан “та нар өнгөрсөн хүмүүс” гэж хэлдэг бол Гэтэлгэгч маань ямар ч буруу зүйл хийсэн бидэнд гэтэлгэлийг санал болгодог.

Амьдралынхаа тухай эргэцүүлэн бодоход танд өөрчлөх хэрэгтэй зүйлс байна уу? Засах алдаанууд байна уу? гэдгийг бодоорой.

Хэрэв та нар гэм буруу болоод харамслын мэдрэмжийг амсан, уур хилэн, итгэлээ алдан зовж байгаа бол түүнээсээ чөлөөлөгдөх боломжийг эрэлхийлэхийг би уриалж байна. Наманчил мөн гэм нүглээ орхи. Тэгээд Бурханаас уучлал гуйн залбир. Бусдад буруу зүйл хийсэн бол уучлалыг эрэлхийл. Та нарт буруу зүйл хийсэн хүмүүсийг уучил. Өөрийгөө уучил.

Шаардлагатай бол бишоптойгоо уулзаж ярилц. Бишопууд нь Их Эзэний нигүүлслийн зуучлагч мөн. Наманчлалаар дамжуулан цэвэр ариун болоход саад болж байгаа зүйлээс салахад чинь тэрээр та нарт туслах болно.

Өөрийгөө залбирал болон судар судлахад зориулаарай. Ингэснээр та Сүнсний ариусгагч нөлөөг мэдрэх болно. Аврагч: “та нар өөрсдийгөө ариусга; тийм ээ, би та нарыг цэвэр ариун болгож болохын тулд зүрх сэтгэлээ цэвэршүүл, мөн миний өмнө гараа цэвэршүүлэгтүн”<sup>18</sup> гэж хэлсэн.

Бид Түүний Цагаатгалын хүчээр дамжин цэвэршихэд Аврагч Эцэгийн хамт бидний өмгөөлөгч болдог. Тэрбээр:

“Эцэг минь, нүгэл үйлдээгүй, Таны таалалд нийцсэн түүний зовлон хийгээд үхлийг болгоогтун; мөн Хүүгийнхээ асгарсан цусыг, мөн Та Өөрөө алдаршихын тулд Таны өгсөн, бас Түүний цусыг болгоогтун;

Иймийн тул, Эцэг минь, тэд надад ирж бас мөнх амьдралыг авч болохын тулд Миний нэрэнд итгэх эдгээр ах дүүсийг минь өршөөгөөч”<sup>19</sup> гэсэн юм.

Бидэнд чөлөөтэй сонгох бэлэг өгөгдсөн. “Хүмүүн нь бие махбодийн дагуу чөлөөт болой. Мөн тэд бүх хүмүүний агуу их Зуучаар дамжуулан, эрх чөлөө болон мөнх амьдралыг сонгох эсвэл чөтгөрийн хүч мөн боолчлолын дагуу, боолчлол болон үхлийг сонгох эрхтэй.”<sup>20</sup>

Олон жилийн өмнө дүү маань буруу сонголт хийж амьдралын хэв маягаа өөрчилснөөр эрүүл мэнд, гэр бүл ба Сүмийн гишүүнчлэлээс хасагдах зэрэг үр дагаврыг амссан. Он жилүүд улиран одож тэр мөн чөлөөт сонголтынхоо дагуу наманчлах, амьдралаа Аврагчийн сургаалуудад тохируулах, Цагаатгалын хүчээр дамжуулан дахин төрөхийн гайхамшгийг мэдэрсэн юм.

Би Цагаатгалын гайхамшгийг гэрчилж байна. Цагаатгалын эдгээх хүчийг дүүгийнхээ амьдралаас би харж мөн өөрийн биеэр мэдэрсэн. Цагаатгалын эдгээн, гэтэлгэх хүч нь хүн бүрт үргэлж боломжтой байдаг.

Би Есүс бол Христ бөгөөд бидний бодгалийн Эдгээгч гэдгийг гэрчилж байна. Хүн бүр “Та нар надад эргэн ирж, мөн нүглүүдээ наминчилж, мөн хөрвүүлэгдэхгүй гэж үү?”<sup>21</sup> гэсэн Аврагчийн урилгад хариулахыг сонгох болтугай хэмээн би залбирч байна. Есүс Христийн нэрээр, амен.

|

Эшлэл

1. Лук 15:17.

2. Сургаал ба Гэрээ 58:42–43.

3. 2 Нифай 2:25–26-г үз.

4. Алма 34:14-ийг үз.

5. Алма 42:15.

6. Алма 34:11-ийг үз.

7. Алма 34:10-ыг үз.

8. Алма 22:14-ийг үз.

9. Мозая 15:7.

10. Мозая 14:10.

11. Мозая 3:7.

12. Алма 7:11-12.

13.

Мозая 14:4.

14. *Миний сайн мэдээг номло: Номлогчийн удирдамж (2004), 2.*

15. Сургаал ба Гэрээ 18:22.

16. Сургаал ба Гэрээ 19:15–18.

17.3 Нифай 9:13.

18. Сургаал ба Гэрээ 88:74

19. Сургаал ба Гэрээ 45:4-5.

20. 2 Нифай 2:27

21. 3 Нифай 9:13.